

Neuvoja vanhuuksille hoijosta lapsen ensimmäisenä elämänviikkona

- Ensimmäisinä vuorokausina lapsi tarttee likeläoloa vanhuuksitten kansa ja taajaa vaarinpitoa. Älkää jättäköö lasta yksin.
- Lasta pittää imettää varsin ko se näyttää ette se halvaa imeä.
- Pitäkää huolela ette lapsi kussee ja paskantaa säänölisesti.
- Kattokaa lapsen ihofäriä selvässä päivävalossa kerran elikkä kahesti päivässä. Ette iho ja silmävalkeat oon vähän kellastunheet oon normaalia, mutta jos lapsi oon selvästi keltanen kropasta ja silmistä se saattaa tarvita apua. Kysykää silloin neuvoja BB:ltä elikkä lapsenhoitosentraalista. Lääkäri pittää aina syynätä jos kellastuminen oon jäljelä enämpi ko 3 viikkoa.
- Pikkulapsi nukkuu turvalisiimasti sölälensä ja pittää saaja siiheen harjaintua jo vastasyntyntynheenä.
- Lapsela pittää olla passelin lämpimät vaatheet päälä ja pystyä liikkumhaan vaphaasti.
- Polttaminen vaikuttaa lasta negatiivisti. Vältä sen takia kaikki polttaminen kotona. Jos äiti polttaa elikkä jos joku vanhuuksista oon juonu alkkohoolia niin lapsi ei piä nukkua samassa sängyssä ko hänen vanhuukset.
- Vältä ottamasta vastasyntyntynettä lasta paikhoiin joissako oon paljon ihmistä. Yskänaikoina räkäset ja infekteratut siskot ja omhaiset ei piä olla likelä kontaktissa lapsen kansa. Yskäviirus joka isomille lapsile ja täysile antaa lievän nokkatuvon ja yskän saattaa vastasyntyntynheele antaa vakavia kurkkutorvisymtoomia. Pese käet ennen ko sie hoijat sinun lasta.
- Jos lapsi ei halvaa imeä, ei herrää nukkumisen jälkhiin, oon ärtäintynny ko sie kosket sitä ja yrität saaja sitä itkemästä, ko lapsi ei huua lujaa elikkä jos sillä oon pleekinharmaja ihofäri se saattaa olla saihrauven merkki. Ota yhtheyttä BB:n elikkä akyttihoijon kansa vaikka olis mikä aika vuorokauvessa.
- Lapsen ensimmäisen elämänviikon aikana, ennen ko sie olet kohanu saihraanhoitaijaa sinun lapsihoitosentraalilla, se oon BB:le johonka sie ensi siassa piät kääntyä jos sattuu olheen prupleemiä elikkä kysymyksiä lapsesta. Se oon BB:n vastuu ette antaa sulle neuvoja elikkä käskeä mennä lääkäriin jos lapsi sen tarttee. Piä huolela ette sie saat telefooninumeron johonka sie saatat soittaa jos sie uskot ette lapsi tarttee apua!

Telefooninumero neuvonantamiselle ja mihinkä kääntyä jos oon prupleemiä vastasyntyntynheen lapsen kansa:

Neuvot oon osa Projektistä Varma Syntymishoito joka oon yhtheistyö seuraavitten föreninkitten välissä: Ruottin Föreninki Neonatologiile Ruottalaisessa Lapsilääkäriföreninkissä, Ruottin Paarmuskaliitto ja Ruottin Föreninki Obstetriikile ja Jynekolokiile. Projektile antaa tukea Potilasvakuutus LÖF

